



廣東新語卷一

崇禎  
圖書

番禺 屈大均 翁山 撰

天語

日

羅浮稱朱明之天日之初出山上輒先見之有見日臺焉俯臨三千餘仞所處高故所見早人見之於旦於晝予則嘗見之於中夜求之於未出之前得之於將出之際為之恭敬導引寤寐不遑而取火氣之精光明盛實以麗其德焉蓋夜中見日自昔皆言羅浮之異嘗有客宿于山巔夜分見第三

39-8207

重峰有塊火大如車輪光怪迴翔與他火異怪之  
一客曰此爲天燈久之當有鷄鳴所謂天鷄也梵  
書云日宮一樹而有鷄王棲其上彼鳴則天下鷄  
皆鳴天鷄者日中之鷄也已而空中果聞鷄鳴聲  
亮而長則日出于蒼莽中矣太白云半壁見海日  
空中聞天鷄劉夢得云呶喔天鷄鳴扶桑色昕昕  
子瞻云人間有此白玉京羅浮見日鷄一鳴南樓  
未必齊日觀鬱儀自欲朝朱明山故有二石樓其  
南樓則觀日之所也然扶胥之口地以卑而見日  
若凌倒景比羅浮所見乃益竒郁溪云日自地出

而行于水之外水自天來而行于日之中故觀日  
尤宜于水扶胥者廣東諸水之匯也南海之神廟  
焉其西南百步有一峰巋然出于林杪是曰章丘  
俯瞰牂牁之洋大小虎門之浸驚濤怒颶倏忽陰  
晴洲島縈迴遠山滅沒萬里無際極于尾閭誠炎  
溟之巨觀也一亭在其上以浴日名吾嘗中夜而  
起四顧寥寂潮鷄始聲月影未息俄而獅子海東  
光如電激繚紅而黃波濤蕩滌半暈始飛鴻濛已  
闢火雲一燒天海皆赤潮頭高以數丈日體大可  
百尺因詠子瞻坐看暘谷浮金暈與白沙赤騰空

洞昨宵日之句心蕩神搖欲擬之而茫然未得也  
蓋日之初出其體甚大故泰山記日觀鷄一鳴  
時見日始欲出長三丈所而吾嘗舟出零丁四更  
月上忽見大洋東畔湧出一山甚大色深紅其形  
如覆半月舟人呼曰日出矣已而漸升盡出水約  
之尚可三五十丈比泰山所見乃益大又日中有  
青色四道一直而三橫其左一橫最長欲出輪外  
右二橫微短皆以為樹也予謂不然蓋日以離為  
體而震為用離始乎震日中之青則震之象也震  
為天地乎黃之始立出為青青出為紅紅轉為黃

青則火之始紅則火之中黃則火之終郁溪云凡  
月以予為體而生光則白金之生水也日以黃為  
體而生明則紅木之生火也黃者離之元乎者坎  
之元也混沌之初天欲開而一真之洩於坎為予  
地欲闢而一真之洩於離為黃日也者一真之洩  
於離是也如曰日中有樹者日以震生震為木而  
扶桑者震本之大在於海東故鄭漁仲云日在木  
中曰東木若木也日所升焉者也日中有樹是或  
扶桑之影所入也又日生于木木者日之本本在  
于日體之中無象而有象者也日體之大則南方

距日不遠故見日大南溟距暘谷不遠故見日大  
又見其外體故大也外體者明也內體者光也初  
出時先見其外體明而未光陰而未陽爲山林川  
澤之氣所映蓋故大而且滄涼也亭曰浴日者淮  
南子云日浴於咸池咸池者暘谷也凡日出之處  
皆曰暘谷南海陽明之谷谷之大者也書云宅嵎  
夷嵎海隅也章丘在海隅亦嵎也嵎夷暘谷一也  
日出於谷而天下皆明故觀日者必於谷上有羅  
浮下有章丘於高見日之小於卑見日之大而皆  
在於夜中然西樵亦有見日臺在大科峰頂冬時

日行南無羅浮之蔽則見日尤早蓋月始於午之  
半故晝中生月日復於子之半故夜中生日而夜  
中生日天下惟<sup>南</sup>山與羅浮見之以遼大海也西  
樵亦然見日臺猶之乎日觀也哉

戴日

爾雅言距齊州以南戴日爲丹穴蓋南人最事日  
以日爲天神之主炎州所司命故凡處山者登羅  
浮以賓日處海者臨扶胥以浴日所謂戴日之人  
也又日之所中在其首上故曰戴其地亦曰日下  
日下者爾雅疏云去中國以南北戶以北值日之

下其處名丹穴是也

日南

漢明帝時合浦人張重爲日南郡從事舉計入雒  
帝問重日南郡北向視日也對曰天下北有雲中  
南有日南雲中非必在雲之中日南豈必在日之  
南日南之日亦出於東耳帝善其言吾以爲日南  
者非在日之南乃日在於南也日南者又天之南  
也不曰天南以其地在南方積陽之極人多文明  
物多瑰麗皆日之精華所發故曰日南也南方爲  
離離爲日以日名南以其得日之多也日出於南

是南爲日之所有月出於坎是北爲月之所有日  
有其南而月不得有故曰日南也又易稱日月得  
天而久照日得天之南而天遂以南歸之若天不  
有其南然者故曰日南也

月

南海水鹹月出時光照波濤有如白日蓋光生於  
鹹鹹爲火氣月得鹹而益光非月光也鹹之光也  
故曰山之月光如水海之月光如火莊子云月固  
不勝火非不勝也爲火之光所亂也然吾意月之  
在南海也得水之精十之四得火之氣十之六何

也月無光以日而為光日無光以火而為光日以  
火而為光則月亦以火而為光也又火無體因物  
而為體人心亦然心體於物而日體於火月又體  
於日則日者火之精得之於晝者也月者火之氣  
得之於夜者也故謂南海之水火水也南海之月  
火月皆可也

星

秦二世二年五星會東井倍于南斗說者曰東井  
秦分未分也南斗越分丑分也丑與未相背秦失  
王氣則越得霸氣故尉佗應之而興也按星經河

戌六星夾東井當南北兩河各三星南曰南戌主  
越門北曰北戌主胡門則觀南越之星者觀南戌  
觀南戌者觀南斗故漢元鼎六年春熒惑守南斗  
而建德以亾梁大同五年冬彗出南斗東南指長  
一丈餘而李賁稱帝交州隋大業九年夏五月丁  
亥熒惑入南斗其八月賊帥陳瑱陷高要九月賊  
帥梁慧尚陷蒼梧十二年秋九月有二枉矢出北  
斗魁委曲蛇形見於南斗而豫章劉士宏自稱楚  
帝地及番禺宋皇祐元年秋九月乙巳太白犯南  
斗而廣源蠻儂智高反四年夏五月寇封川復圍

康州破之直攻廣州十月丙子太白復犯南斗而  
智高敗死廣南平紹定元年秋七月熒惑犯南斗  
咸淳五年夏五月有星孛于斗牛其後南恩州肇  
慶新封等州俱降于元祥興元年秋八月庚申月  
貫南斗乙己星隕于海如雨其明年夏五月師潰  
桂山丞相陸秀夫抱帝赴海死元至元二十一年  
秋九月癸巳太白犯南斗時嶺南義兵數起發江  
西等兵擊破之二十五年秋九月癸卯熒惑犯南  
斗時賀州賊焚掠封川大德七年秋九月熒惑犯  
南斗明年猺賊李宗寇新州元統三年冬十月甲

寅熒惑犯南斗其後增城朱光卿等兵大起明洪  
武八年冬十月有星孛于南斗永樂十三年夏有  
星孛于南斗其後德慶猺鳳廣山瀧水猺趙普旺  
作亂僭稱將軍高要民吳大甌聚黨應之又其後  
南海盜黃蕭養起僭稱東陽王攻犯廣州天啓三  
年六月望熒惑入南斗自下而上守斗中十有四  
日自西轉東其冬流賊自新會焚掠高明四會南  
斗之於越古今皆有占驗如此南斗固越之司命  
也然後漢書云粵地牽牛婺女之分野宋書云牛  
宿六星三星主南越韓愈云百粵之地其次星紀



其星牽牛故漢獻帝永建六年十二月壬申客星  
出牽牛於時士燮保郡二十餘年疆場無事民得  
安生羈旅之徒皆蒙其蔭而仍南漢時月食牛女  
間劉晟歎曰吾當之矣是秋而卒則牛女之間皆  
可以占南越也司馬遷云凡瀕海澤國當繫南斗  
粵之平陸上遊則繫牛女然以度數考之得牛女  
爲多以災祥考之則獨繫於南斗然晉義熙六年  
春三月乙巳月掩斗衡而始興太守徐道覆反四  
月盧循寇湘中陷沒巴陵率衆逼畿輔衡者北斗  
之第五星實殷南斗者也而廣州與廬相去僅千  
餘里而廬屬翼軫與江楚同度故宋熙寧八年十  
月彗星入軫未幾交趾蠻陷欽州靈山則斗衡與  
翼軫亦可以占南越也

### 老人星

粵尽溟海其次居丙丁秋分之曙南極老人見其  
位星書云老人星常於秋分見丙丁之位是也老  
人星亦曰南極老人星以在南極之上近於南極  
故曰南極老人亦猶之乎北斗之非北極也

### 南越之星

南越之星多於天下唐時有人行瓊海以八月時

見南極老人星下有六星無數皆古所未名元微  
之云交間南極漸高北極漸低規極外星辰至多  
星經所不能載有詩云規外布星辰方愚者云南  
極下有海石金魚飛鳥小斗附白諸星于南極甚  
近漢書載海中星占一卷或即此等星均按瓊州  
於苾種日以星候秧枷犁尾星出則秧死猪尾星  
出則秧黃此二星亦老人星下古所未名者

### 星聚

日月星起於斗宿古之言天者繇斗牛以紀星故  
曰星紀星紀爲十二次之首而斗牛又二十八宿

之首故斗牛與中星明則其地儒道大興中星在  
正南又吾粵之所宜候者洪武永樂間五星兩聚  
牛斗占者謂黃雲紫水間當有異人已而白沙先  
生出其後成化丙戌中星明於越之分野而甘泉  
以是歲生自此粵士大夫多以理學興起肩摩躡  
接彬彬乎有鄒魯之風祭酒倫右溪常棣二堂於  
越山一曰中星一曰聚星與名儒十有一人講學  
以應其祥王青蘿云五緯惟三星合者有之四星  
合則鮮矣五則又鮮四星合曰昌五星合曰祥故  
五星聚東井餘氣及於越門而南武霸業以立五

星聚牛斗光芒射於南海而江門道學以興天象  
誠不虛垂示也羅公洪先云甘泉考終之夕有一  
星從東南來其大如斗光景燭天至貢院之中而  
隕聲若雷震先生之生應中星之見其沒也應中  
星之隕噫嘻豈非一代之哲人者哉

風

南粵之風當寒時天明無雨從西北暴至爲頽爲  
森其名曰飄亦曰颺當暑時天昏有雨從東北暴  
至其氣純青是曰青東青東之起氣甚寒亦曰青  
凍天昏無雨從西北暴至如雨雹聲又如亂石搏

擊是曰石尤其氣赤亦曰赤游赤火氣也游謂火  
之游氣也天色泠然微有日光無雨而作如龍氣  
往來不常是曰狂龍餘則夏秋之交多颺冬則多  
攬霜以紅霞暮起爲兆或臘月而大南驟作曰送  
年南大北驟作曰暴北又曰鹹頭曰泥浪此皆風  
之變者也平常則多南風然南風煖利於物而不  
利人蓋嶺南陰少陽多故四時之氣闢多於闔一  
歲間溫暑過半以日在南故風自南來者恒煖嘔  
喻太陽之氣與火俱舒又多起於赤天之暑門故  
恒煖煖風所至百螿蠕蠕鐵力木出水地蒸液墻

壁溼潤生蟻衣裳白黻書冊霉黧而粵人疎理元  
府常用毛媵不掩每因汗溢即致外邪蓋汗為病  
之媒風為汗之本二者一中寒瘡相乘其疾往  
為風淫大抵嶺南春夏多南風秋冬多北反是則  
雨故凡疾病多起於風故觀卦風行地上而君子  
必以觀我生觀其生為務蓋風主蟲人為保蟲之  
長以風生亦以風死風之不心莫甚於廣南故多  
瘋疾瘋字從風可以知其患之所自矣內經云卑  
下之地春氣長存故東南之民感風症多陸胤傳  
云南海歲有舊風障氣之害風則折木飛砂轉石

氣則霧蔚飛鳥不經自胤至州風氣絕息孝陵敕  
使臣云冬方多熱少寒其氣柔弱最易冒風非仁  
人君子不得而壽並不得而壽斯民聖言哉  
諺曰南風尾北風頭蓋地勢北高而南下南風從  
下而起故為尾又南風愈吹愈大其大在尾北風  
初起即大其大在頭故也粵處南方當歲寒時每  
三二日南風則有霧北方不然三二日南風則有  
雪凡霧從地起南風之尾為之是曰南風霧其散  
必以北風以煖而起以寒而止也雪自天來北風  
之頭為之是曰北風雪其晴必以南風以寒而起

以暖而止也

海南三四月時晝有南風夜則無之至五月乃有過夜南諺曰半北半南三二月南風過夜必端陽然瓊周歲皆東風夏秋必颶瓊苦颶風崖則南風亦苦盛夏時士庶出入率以青布裹頭蓋南風為厲一侵陽明則病不可起云

風之起潮輒乘之諺曰潮長風起潮平風止風與潮生潮與風死凡朔望越二三日潮初起風必大上下弦越二三日潮漸退風必小蓋風者水之母水生於風者謂之陰水潮是也雷者水之父水生

於雷者謂之陽水雨是也雨起於山潮起於海海為陰故潮亦陰潮以陰故鹹風乘鹹潮而起謂之鹹頭

凡海中以子時末陰與陽合而潮生為陽水午時末陽與陰合而汐生為陰水水乘氣而生風亦因之氣為水之本風為水之末氣自北來而水長風自南來而水消長者自北而南為南海之潮消者自南而北為北海之汐

舊風

南海歲有舊風亦曰風舊蓋颶風也其起也自東

北者必自北而西自西北者必自北而東而俱至  
南乃息謂之落西亦曰蕩西又曰迴南凡二晝夜  
乃息亦曰風癡若不落西不迴南則踰月復作作  
必對時日作次日止夜作次夜止諺曰朝北暮南  
子夜東又曰朝三暮七晝不過一蓋其暴者不久  
或數時或一日夜其柔者久或二三夜有一歲再  
三作者有三四歲不作者凡歲有一鬼打節則有  
一颶有二鬼打節則有二颶鬼鬼宿也打節者或  
立春立夏等節值鬼宿也又凡六月有北風必作  
颶諺曰六月無間北北風爲正風舊東風爲左風

舊風舊以鐵颶爲大無堅不摧故曰鐵迴南時勢  
尤猛烈

粵在南方故其風起於南者爲順起於北者爲逆  
順者爲正風天地之仁氣也逆者爲颶風始於北  
而終於南從不仁以歸於仁也仁陽也不仁陰也  
颶起多以仲夏以午仲夏與午陰長陽消之始也  
颶得陰氣之先初起時有雷則不成颶未純乎陰  
也颶作數日有雷則止者陰氣爲陽所奪也起於  
朝者三日於暮者七日暮而陰氣益盛故颶發之  
久也然七日而無雷則颶亦止七者數之盡陰與

陽皆以七日而復也。又颶之暴者不久而柔者久柔陰之極也。奮雷者陽畜之極故不終日。颶者陰畜之極故多日不終日之雷其雷多吉終日之風其風多凶。颶終日之甚者也。凶之氣也。天地之道雷欲其有初而无終。雷而有終斯為振恒之凶。風欲其无初而有終。風而无終斯為終風之暴。說文有颶而无颶。或以為颶即颶也。予謂颶起於日南日之風也。日者火之本。颶者風之本。颶與日交風隨火發故為最烈之氣。則謂颶曰颶亦可也。昌黎詩雷霆逼颶颶。颶颶二字相連則颶颶一也。

颶從日者律書南方景風夏至至景大也。日至夏始大。陽氣長養也。颶風大者皆以夏月發。日氣過盛故掀山簸海而訇哮不止也。唐官制有颶海道。不曰颶海者以瓊海為日南之地。颶多從瓊海而起。故海曰颶海也。颶者具四方之風也。凡颶以東北方而始必以北以西而中以西北方而始必以北以東而中而皆以南而終。蓋南方之風以南為正始於不正終於正。故颶必迴南乃止歸於其本方也。南人以颶為懼。颶又懼也。懼於始復懼於終。懼其再作終而又

始也故曰颶者懼也當懼之時人不望颶風之止  
惟望迅雷之作雷作而颶止矣然雷亦必以颶迴  
南而後作颶不終則雷不作也二者必相代而不  
相奪以為天地之用者也颶莫甚於瓊雷廉次之  
廣又次之至韶南而力未矣故瓊人最懼颶風其  
發也先期數日有聲微作作而旋止急而旋緩謂  
之練風於是炎雲鬱結雷聲殷殷有虹欲斷欲連  
下飲海水海翻聲吼怒波浪沸騰礧石搏觸有濁  
氣凝結成破布或若爛苔遍流而北水鳥驚飛木  
葉南側於是颶風作矣益之以暴雨以驚潮則其  
勢彌暴屋飛於山舟徙于陸顛仆馬牛摧拔樹木  
海水湧高數丈洋田浸沒鹵鹹所留稼穡不育是  
之謂鐵颶

風候

廣州風候大抵三冬多煖至春初乃有數日極寒  
冬間寒不過二三日復煖者嶺南之常寒乃其  
變所以者陽氣常舒南風常盛火不結於地下而  
無冰水不凝於空中而無雪無冰無雪故煖  
凡水之氣欲其升故傳曰水無沉氣火之氣欲其  
降故傳曰火無炎燁廣中火之房氣嘗不降故多



燠又傳曰天無伏陰地無散陽廣中之陽多散故  
四時常燠大抵陽貴聚而不貴散陰貴散而不貴  
聚故易之離言畜牝牛吉畜者何言貴乎陽之聚  
也

凡地之陽氣自南而北陰氣自北而南比年嶺表  
甚寒雖無雪霜而凜烈慘淒之氣在冬末春初殊  
甚北人至此多有衣重裘坐卧火炕者蓋地氣隨  
人而轉北人今多在南故嶺表因之生寒也予詩  
邊人帶得冷南來今歲梅花春始開頭白老人不  
識雪驚看白滿越王臺又云一自邊人至南中得

雪看炎天無舊煖漲海有新寒

立春宜微寒諺曰春寒春暖春暖春寒蓋南中以  
春寒為祥其望春寒所以望春暖也春立春也一  
春之寒暖以立春卜之立春又宜晴諺曰春晴一  
春晴春陰一春陰而元日則宜微雨宜北風宜西  
北東北風不宜南風東風有微雨而北風則寒寒  
亦為春暖之兆又以是日權水水重則雨多輕則  
雨少日直其月至十二日而止以測十二月之水  
旱寒故水重水重者多雨而年豐之兆也  
嶺南之地其屬韶陽者秋冬宜寒而反熱春夏宜

熱而反寒青艸黃茅二瘴即土著亦有深者大抵  
冬不甚寒而春寒夏不甚熱而秋熱似占嶺北氣  
候較遲而風鳶之戲嶺北以八九月嶺南以二三  
月則地氣升降不惟稍遲亦似相反則亦楚之風  
候也舊以隸屬桂陽蓋亦有說

嶺南瀕海之郡土薄地卑陽燠之氣常泄陰溼之  
氣常蒸陽泄故人氣往往上壅腠理苦踈汗常浹  
背當夏時多飲涼冽至秋冬必發痲瘡蓋繇寒氣  
入脾胃屬土主信故發恆不爽期也陰蒸故晨夕  
霧昏春夏雨淫人民多中瘧溼間發流毒則頭面

四肢倏然癢癢醫以流氣藥攻之每每不效是曰  
走馬胎以燈火迴環爆之或男左女右於手尺澤  
穴以艾灸之其或霍亂痞瘡腹痛不堪是曰急沙  
以炒鹽沃清水飲之或於足下股上尋其紫色筋  
脉以鎚刺血出之謂之刮沙皆可愈諺曰緩沙急  
沙刺出血花走馬之胎火爆如雷

### 雷風

東粵之地陰陽二氣恆不得其和而雷瓊二州尤  
甚雷州在海北多陰雷生於陰之極故雷州多雷  
瓊州在海南多陽風在於陽之極故瓊州多風凡

風生於火者陽風生於水者陰風雷出於山者陽  
雷出於澤者陰雷瓊州在水中其風多陰雷州在  
山中其雷多陽而二州雷風往來相應雷州雷則  
瓊州風瓊州風則雷州雷瓊州風甚則雷州雷亦  
甚雷州雷甚則瓊州風亦甚其氣常相摩盪也雷  
人事雷瓊人事風皆甚謹風以颶為大凡南海之  
颶皆起於瓊瓊之颶又起於崖崖為海之極南其  
地最虛去州東百有餘里有一巨穴颶風恆出其  
中呼於山則為迅雷吸於澤則為淫雨常与之終  
始蓋地氣不得其平所致黎人虔禱是山颶風輒

息名曰息風之山瓊有息風雷有擎雷二山洞竅  
皆相潛通者也擎雷為雷州鎮山或謂雷州以擎  
雷之山得名非也州多雷而是山高夫能擎是州  
雷多泛之而出故名擎雷所以然者州之南地瀕  
於海其陂塘隄岸不能自固鯤鵬之所變化瘴母  
之所憑陵民日夜以懷襄為懼疆域雖延袤千里  
求一夕之安未易數然也所恃擎雷之山以為  
砥柱所閔不小風水之災皇天為拜跪不寧噫嘻  
雷州則誠危地也哉嗟夫地至雷州極矣北極出  
地僅二十度有奇瓊又少一度自雷至瓊浮海百

餘里月度數已別則地勢之卑視北海不啻倍蓰  
昔人謂地形欹信矣地以卑故陽力微薄不能厚  
畜其震驚之性而雷動徃々非時州名曰雷言多  
雷之變也

### 冬雷

嶺南以冬雷爲常蓋瀕海地薄不能固畜其火故  
陽氣早泄而冬雷又其地最下而雷州地形如舌  
吐出海濱三百里爲卑下之極故多雷語云北方  
寒有無雷之國南方熱有無日不雷之境地最下  
故熱以其與日近也與日近故與雷近無日不熱

故無日不雷陽氣太盛常奮擊而爲聲耳然冬雷  
終屬災異

### 舊雷

雷州之俗以雷在春前者爲舊雷交春爲新雷歲  
除時舊雷與新雷相接其占爲明年大稔有詠者  
云臘底雷鳴是舊雷新雷聲向歲朝開舊雷之稱  
奇甚雷州有舊雷瓊州有舊風可以並舉

### 陰雷

雷州之雷其無聲者曰陰雷陽雷以生陰雷以殺  
天之所以爲道也其陰雷何也有受害者訴于神

其仇讐忽震以死人皆弗聞也者頂有一孔氣出若硫磺背篆書數行莫可辯雷州人以為陰雷也蓋陽雷在天陰雷在人陰雷之出無時人實為之故君子畏陰雷也

### 雷耕

相傳雷州陰晦之夕謂之雷耕曉視田中有開墾跡非雷耕也雷州地暖春初時雷始發聲農則舉趾而耕故曰雷耕雷出田中故疑有開墾之跡也又雷州無日不雷故農人無日不耕其稻有六十日而熟者有九十日而熟者有二月種而十月熟者有十一月種至明年四月而熟者或歷兩時或三時或四時其稻無日不種亦無日不穫也雷人之耕蓋有異乎他郡之耕也故曰雷耕

### 雲

粵地每多赤雲蓋粵本火方火之用事火在地中則麗而為丹山在水則澄而為碧海在天則光怪而為赤雲是皆離明之所發也而廣州北山多白雲或以為珠海之氣所化海大澤也大澤者吐噏兌之精華其氣多白氣成形為雲雲之諸色則昏且之日与水氣相暎而成者也山臨珠海每當晴

霽如積雪浮空半天皆素或作龍文或魚鱗微帶  
金彩渚有云越雲如龍殆謂是也

客有登新安杯渡山者見一縷煙從海出漸次繚  
繞上天化作稠雲頃之海中復有千萬烟樓上出  
天乃大雨蓋雨者雲之所為而雲從山中出者多  
晴從海中出者多雨易曰雲上于天需雲者雨之  
所需也氣始為煙中為雲終為雨也

山之溼氣蒸而為雲澤之燥氣動而為風風生於  
燥雲生於溼故山氣清則月明澤氣清則日麗廣  
州治背山面海地勢開陽風雲之所蒸變日月之

所摩盪往往有雄霸之氣城北五里馬鞍岡秦時  
常有紫雲黃氣之異占者以為天子氣始皇遣人  
衣繡衣鑿破是岡其後卒有尉佗稱制之事故粵  
謠云一片紫雲南海起秦皇頻鑿馬鞍山而新會  
當宋皇祐間龍山下有黃雲鬱起水色變為紫者  
旬日人以為文明之瑞明興白沙遂符其兆故今  
學宮書云聖人門青天白日新會學紫水黃雲  
或云南海多蛟蜃故雲色駁蓋蛟蜃乃雉所化雉  
有文采形雖化而其氣未化氣雜於海雲之中故  
雲色駁也大抵海之雲生於水氣者十之七生於

蛟蜃氣者十之三記曰天降時雨山川出雲此真雲也

雨

凡天晴暴雨忽作雨不避日日不避雨點大而疎是曰白撞雨亦曰過雲亦曰白雨諺曰下白雨娶龍女白雨者冷熱之氣所蒸夏間為多其勢苦暴邵子所謂火雨也嶺海炎方夏日火尤盛故多白雨六月火在天上故先下火雨乃為水雨而霧霏也子瞻詩夏畦流膏白雨翻升菴云俗以暑雨乍落乍晴日光穿漏謂之天笑即白雨也白雨互早

稻諺曰早禾壯須白撞或日色微黃且日且雨是曰黃日雨亦曰黃雨其氣溽而蒸是生螟蟲禾最患之故曰白雨宜禾黃雨不宜禾子詩冬天白雨早禾宜更為園林熟荔支今歲無多黃雨下農夫相慶酒杯持又早禾宜朝雨晚宜夜雨廣州夏雨恆多宜早禾高雷秋雨恆多宜晚禾其或東望濃雲有雷電而雨西則否或南望濃雲有雷電而雨北則否是曰分龍雨亦禾之宜其不宜者二蠱蠱者蟲也其生於雨者曰雨蠱生於風者曰風蠱瓊於廣州風氣絕殊瓊冬至宜雨諺曰冬乾年溼

禾米莫粒而廣冬至不宜雨諺曰乾冬溼年禾黍  
滿田瓊元日宜晴諺曰冬溼年乾倉廩團團而廣  
元日宜微雨諺曰年溼冬乾農夫加餐瓊三月三  
日雨天蠶損秧四月八日無雨蟲盛禾苗壞而廣  
四月八日雨十四日無雨則穀多瓊端午日暮而  
雨宜田旱而雨則下田傷不雨則高田傷而廣五  
月朔宜雨雨則井泉浮年豐初二日不宜雨雨則  
井泉乾年歉五日亦不宜雨瓊七月七夕有雨則  
八月有雨廣七月七夕有雨則八月無雨處暑無  
雨則白露有雨白露雨謂之苦雨禾沾之白颺果  
苦則殺物

冰

生蟲蔬菜味苦凡雨有甘苦故詩曰以祈甘雨左  
傳曰秋無苦雨蓋春雨為甘秋雨為苦甘則生物  
苦則殺物

粵無冰其民罕知有南風合冰東風解凍之說歲  
有微霜則百物蕃盛諺曰勤下糞不如早犁田言  
打霜也冰生於霜粵無冰以無霜也故語曰嶺南  
無地著秋霜又曰天蚩不落雪即或有微冰輒以  
為雪或有微雪以為冰人至白首有冰雪不能辨  
者大抵陽火之氣下積陰冰之氣上凝則為冰嶺



之南陽生多而陰殺少火畜于地而水不斂于天  
天之水嘗融地之火嘗結故隆冬之候澤腹不堅  
間有薄冰亦不崇朝而泮故其人輒不識冰也冰  
者霜之終霜者冰之始凡九月而陽未盡則霜不  
嚴十二月而陰未純則冰不厚嶺南地暖陰道不  
凝故或以露始而不以霜終或以霜始而不以冰  
終坤道之馴至於寒極而戰未盡與大易準也或  
極寒亦有微霰然未至地已復為雨矣少陵云南  
雪不到地是矣

### 霜露

廣州有霜而無雪然霜亦微薄不可見秋深以木  
葉微紅知其為霜耳霜者白露凝戾而成廣州地  
暖白露出於土者難晞故霜在有無之間所以然  
者露者純金之氣也嶺南火盛而金衰秋深猶熱  
金氣不能成液故少露露少故不結為霜而殺艸  
也然丑歲後霜亦微降負者無絮以禦冬手足微  
有皸瘃亦非疾痛苦事蓋以霜不嚴故也

### 甘露

方文襄嘗與王青蘿鄧敬所何古林講學西樵甘  
露連降三日青蘿詩云同德之和如氣之和同心

之逐如露之甘

霧

嶺南之地火氣多而常鬱積火極則水生生之時未成水而先成霧霧者瘴之本以霧始必以瘴終每當日出山野間有白氣縷々自下而上須臾凝瀰四布蒙如輕塵咫尺不辨人物此乃濁陰乘太陽而升為瘴之所從出而與風相因者蓋瘴者風之屬氣通則為風塞則為瘴易曰山下有風蠱風止於山故成蠱瘴者蠱之所蘊釀者也故凡濁陰勝則為冷風冷瘴濁陽勝則為熱風熱瘴其源因

於霧亦因於風蓋霧之為瘴十而七風之為瘴十而三嶺南多霧瘴滇黔多風瘴是皆氣候之最惡者也嶺南之霧近山州郡為多自仲春至于秋季無時無之暖極而霧是謂南霧言南風之霧也寒極而霧是謂北霧言北風之霧也南霧三日必有大雨或大風北霧必晴晴而自旦至午霧猶不分暑雨衝激其氣毒淫瘴之所結翳勃如雲而香花瘴尤甚當木樨開時山嵐氣隨之而發行者聞有異香出林味如桂菊氤氳不散則香花瘴之所為也瘴以香誘人愛其香而以鼻呼吸則其毒灌入

心脾不可藥矣近海州郡地氣稍舒風潮之所蕩  
滌清淑之所扶輿雖一日之間晝多燠而夜多寒  
晴甚燠而陰甚寒寒或多積霧燠或多淫霖而偏  
沴之氣方生即散故為諸瘴絕少天以陽施地以  
溼感寒暑相搏但為瘧疾而已無甚疫疠之害也  
故凡瘴之中人也疾多黃羸足重而偏枯癱瘓不  
一霧之中人也體倦而脚酸上嘔下瀉療治之法  
有宜散其寒邪有宜下其熱毒必診視所中何如  
然後鍼藥從之

凡十月朔有霧則明歲正月雨初二有霧則明歲  
二月雨一日應一月是日無霧則明歲是月無雨  
霧者雨之微也十月為水生之始水將生先之以  
霧霧為雨始雨為霧終

### 瘴

嶺南之地愆陽所積暑溼所居喪喪之氣每苦蘊  
隆而不行其近山者多燥近海者多溼海氣升而  
為陽山氣降而為陰陰嘗溢而陽嘗宣以故一歲  
之中風雨燠寒罕應其候其蒸變而為瘴也非煙  
非霧蓬、勃、又多起於水間與山嵐相合艸萊  
沴氣所鬱結恆如宿火不散溽熏中人其候多與

暑疢類而絕貌傷寒所謂陽淫熱疾也故入粵者  
飲食起居之際不可以不慎當唐宋時以新春儋  
崖諸州為瘴鄉謫居者往々至死仁人君子至不  
欲開此道路在今日嶺南大為仕國險隘平山  
川疎豁中州清淑之氣數道相通夫惟相通故風  
暢而蟲少蟲少煙煙瘴稀微而陰陽之升降漸不  
亂蓋風主蟲蟲為瘴之本風不阻隔于山林雷不  
屈抑于川澤則百蟲無所孳其族而蠱毒日以消  
矣在易之蠱剛上而柔下則不交故巽而止止而  
蠱父之蠱父之氣止也母之蠱母之脉止也天氣

止則為父之蠱地脉止則為母之蠱幹之者靜則  
為陰以通水之脉動則為陽以通火之氣吾之中  
和致則天地之中和亦至故曰幹今之嶺南地之  
瘴亦已微薄矣獨人心之蠱未除耳犀象珠璣金  
玉心之蠱也沉速多羅絨雨緞心之蠱也客游於  
斯者其亦以清蘆之藥治之母徒自蠱以蠱其子  
孫可乎

瘴之名不一當八九月時黃茅際天暑氣鬱勃有  
若釜鬻人行其間苦為冷毒所熾昏眩煩渴輕則  
寒熱往來是謂冷瘴重則蘊火沉々晝夜若在爐

炭是謂熱瘴稍遲一二日則血凝而不可救矣最重者一病失音莫知所以是謂啞瘴冷瘴者與痰瘴相似秋未多患之天涼及嚴寒少有若回頭瘴則因不能其水土冷熱相忤陰陽相搏遂成是疾損養者知此亟宜自慎毋多早行毋多露宿毋多日中而馳蓋日中酷暑驟雨初消陰陽之氣交刺艸木蒸變行人最忌宜少駐駕以避之而又毋輕解衣衣解即服涼勿踰時斯為勿藥之喜又嘗有溫中固下升降陰陽之法以相濟使其天和不傷真氣不耗則亦何瘴之足云嗟夫天地一氣之始

甚微蘊而為風濁而為煙霧為瘴而天地之真氣隱矣惟人亦然神明蕩則其真氣亦隱於是而陰陽俱濁為煙為霧為瘴以自昏蒙有不能保其天年者矣故惟心存而後氣存氣存於一念之中而心周於天地之外斯能清明在躬志氣如神而無瘴癘之患

瘴之起皆因草木之氣青艸黃梅為瘴於春夏新禾黃茅為瘴於秋冬是名四瘴而青艸黃茅尤毒青則為艸黃則為茅一盛一衰而瘴氣因之蓋青艸時惡蛇因久蟄土中乘春而出其毒與陽氣俱

吐吐時有氣一道上衝少為散漫而下如黃霧或  
初在空中如彈丸漸天則如車輪四擲中之者或  
為痞悶為瘋癩為汗死若伏地從其自擲閉塞口  
鼻不使吹噓俟其氣過方起則無恙蓋冷方土脉  
疎地氣易泄百蟲之氣易舒而人膚理亦疎二疎  
相感汗液相誘而艸木之冷氣通焉其名中艸子  
吐与下之皆不可宜於中脘氣海三里灸之或於  
大指五指灸之或以鍼刺額及上脣以猪葉擦舌  
出血徐以菖解之內熱除則愈此鄭露之言也

半虹

雷之別每見天邊有暈若半虹長數十丈初圓而  
黑漸乃廣濶如破帆其名風蓬亦曰颶母又曰瘴  
母瘴母起則颶風隨之颶生於瘴瘴為氣颶為風  
氣者風之母故曰颶母颶母先成形而為半虹胎  
風其中經四五日而後颶發積之久者發之暴其  
候不爽故蘇過云斷霓飲海而北指斷霓一作斷  
虹即半虹也廣卅四時虹見半虹則以將颶而後  
見半虹飲水水氣腥又吐為犁頭雲是曰颶雲先  
為虹而後為雲虹斷而雲作犁頭狀夾日以翔于  
南其色純赤此火之氣也火以生風故為颶之母

又颺將作先期一二日有雲片漫空疾飛海人稱  
為颺潮風本雲也而以為風見雲而知其為風也  
雲得氣之先者也此陰雲也陽之雲為雷之始陰  
之雲為風之始也

### 河漢

宓山謂河漢以十月隱二月見天下皆然而嶺南  
臘月晴暖之夜河漢仍見不隱予謂河漢亦海之  
散氣也南海水大而氣溫水暖則天亦暖故河漢  
至冬不隱凡水之精華以春而上浮于天則河漢  
見以冬而下沉于地則河漢隱南海之水其精英

常浮以陽氣太盛其地又疎理閉藏不堅故冬有  
雷有河漢予詩冬天河漢異南海大星多

### 雹

吾粵無雹蓋雹者水之所為水以盛陰而堅盛陰  
脅乎盛陽則雨水而為雹吾粵盛陽之地陰氣不  
凝當寒時不結而為冰則當暑時不散而為雹左  
氏云雹者冬之愆陽夏之伏陰所致吾粵冬而愆  
陽多有之夏而伏陰則少白首老人不識冰之為  
冰與雹之為雹也故或見霰而以為雪見霜而以  
為冰見白雨而以為雹以為珍珠雹也不知其為

白雨也粵在天南多白雨白雨在北則為電電在南則為白雨白雨者電之所散電者白雨之所凝也白雨盛夏益多諺曰六月六白雨足

### 變風

風之始發恒以月七八之日及蚤暮二時過此即甚暴烈多不終朝諺曰七風八到九日無來風過造又曰朝三晚七半夜下風無過日然近海多風亦不如此所云三伏時有颶母起數日間即有巨風起東北必回南轉西而後解或未轉西而解則數日必復暴發凡先西北而後東南曰左颶輒起

輒止曰石尤石尤多以夏秋間潮上時發發必三日連發望西北雲起如螭蚘脚瞬息即至船行宜早避之

瓊州有知風草每能變化乃炎所變葉面背歲或一拆或二三拆或無之每歲葉葉相同無間彼此土人以候歲之颶風有無多少王佐詩颶母崩騰山嶽移方當海未練風時瓊南瓊北無消息獨有知風小草知瓊州最多颶風颶風有祠歲五月五日郡守而下視祭他郡則否

### 風火



火生於雷亦生於風丁巳八月二十夜順德縣有  
大風起暴雨隨之拔木發屋破壞民居無數凡三  
日夜乃止風觸物輒有火光木摧朽處皆焦爛此  
乃天之陰火也陰火生於風陽火生於雷陰火多  
生於海陽火多生於山

廣東新語卷一終

